



冊府元龜

卷之百二十八
至三十



13
849
45



43
849
45



册府元龜

淮南李嗣京參閱

西極文翔鳳訂正

豫章黃國琦較釋

帝王部 一百二十八

明賞第二

唐高祖義師平京師義寧二年正月論功行賞其

京城第一勲授光祿大夫開國郡公物一千段雖第

一勲而身死者亦准此其官迴授子弟宅奴婢仍並

量給第二勲人各授三轉物二百段第三勲人從朝

丹元事明賞二
散加

武德二年四月甲寅出庫物一百五十萬段以分賜太原元從人

太宗武德九年八月甲子即位九月巳酉詔曰褒賢昭德昔王令典旌善念功有國彛訓吏部尚書上黨縣公長孫無忌中書令臨淄侯房玄齡右武侯大將軍尉遲敬德兵部尚書建平男杜如晦左衛大將軍椒子侯君集等或夙預謨謀綢繆帷幄竭心懇到備申忠益或早從任使契闊戎麾誠著艱難績宣內外義貫終始志貞金石誓以河山實允朝議無忌可齊

國公君集可潞國公食邑各三千戶又真食邑各有差遣侍中陳叔達於殿下唱名示之謂朕叙公等勳量定封邑不能盡當宜各自言帝從父淮安王神通進曰義旗初起臣率兵先至今房玄齡杜如晦等刀筆之人功名第一臣竊不伏帝曰義旗初起人皆有心叔父雖得率兵未嘗身履行陣山東未定受委專征建德南侵合軍咸沒於後劉黑闥翻動叔父望風而敗今計勳行賞玄齡等有籌謀帷幄畫定社稷之功所以漢之蕭何雖無汗馬指縱推轂故得功居第一也叔父於國至親誠無所愛但以不可緣私濫與

勲臣同賞耳初丘師利等訴者極多或懷袂指天以手畫地見淮安不得理由是皆息自相謂曰陛下以

至公行賞不私其親吾屬何妄訴

又云秦府副護軍尉遲敬德從平隱

太子巢刺王論功行賞敬德及長孫無忌為第一各賜絹一萬匹齊府國司州幣器物封其全邸物與敬德賜吳國公眞寶封一千二百戶

馬三寶為太子監門率領平道軍將帝嗣位有沙門

法雅謀為妖逆三寶知而奏之法雅竟坐誅於是拜

大將軍賜帛五百匹進爵為公

竇靖為夏州都督屬突厥攜貳諸將出征多詣其所

靖素知虜中虛實具言方畧諸將因之每致尅捷帝

稱善賜物五百段

高宗總章元年十二月破高麗以僧信誠為銀青光

祿大夫賞先降也特進東代都督玄菟郡公泉南生

為右衛大將軍進卞國公賞其鄉導有功也左驍衛

大將軍簡較右羽林軍兼簡較司文正卿鄰國公契

苾何力為鎮軍行左衛大將軍徙封涼國公司空英

國公勳加授兼太子太師仍加寶封通舊一千一百

戶其嫡孫敬業授朝散大夫右武衛將軍薛仁貴為

威衛大將軍封平陽郡公右監門將軍五原郡公李

謹行為右武衛大將軍賞平高麗之功也

睿宗景龍四年卽位六月辛丑以平韋氏功論所賞封薛宗暉爲立節郡王鍾紹京銀青光祿大夫行中書侍郎賜爵潁川郡公劉幽求爲中書舍人仍參知機務賜爵中山縣男白餘封各有差

玄宗先天二年七月誅竇懷貞等賞定策功臣下制曰大臣立事夷險不易良相升朝安危所繫兵部尙書同中書門下三品郭元振偉材生代宏量鎮時經綸文章今之王佐出入將相古之人傑夙侍帷扆疇咨廟堂思志堯舜以期管樂朕往在儲闈洎登寶位每觀其人聞義感激願判忠邪立誠慷慨密陳弘益

爾其至矣朕實嘉之頃者梟獍興謀干戈作釁太上皇命朕除討元振又馳奉宸極始則賚予爲弼終則寧朕問安可謂格于皇天貫于白日元惡旣翦物共爲新昌言是圖朕豈忘舊宜開井邑永誓河山元振可封爲代國公食實封四百戶賜物一千段以前中書侍郎王琚爲戶部尙書封趙國公食實封三百戶殿中監張皎爲工部尙書封楚國公食實封五百戶太僕少卿王守一爲太常卿封晉國公食實封五百戶殿中少監李令問爲殿中監封宋國公食實封五百戶庚午琚皎令問皆以崇寵固辭乃以琚復爲中

書侍郎加實封二百戶通舊五百戶皎爲殿中監充
內外開廐使加實封二百戶通舊七百戶令問復爲
殿中少監兼知尙書加實封二百戶通舊五百戶進
將軍王毛仲爲霍國公賜實封一百戶通舊三百戶
賜吏部侍郎兼雍州長史齊國公崔日用實封二百
戶通舊四百戶又制曰侍中兼太子左庶子梁國公
魏知古中書侍郎同中書門下三品陸象先頃屬艱
虞殲殄凶醜咸能倉卒之際志不顧身許謨之初邪
莫干正有罪斯服抑惟王典無言不酬以勸臣節俾
加茅土式寵鹽梅知古賜食實封二百戶物二百段

象先封兗國公食實封二百戶賜物五百段又賜姜
皎王守一王琚李令問王毛仲甲第各一區並加上
柱國

八月己亥以中書令張說鄒王傳兼國子祭酒褚無
量輔導有功制曰無量執經傳禮敷暢微言俾予遊
夫子之門知先生之道者侍講之功也說又定策監
撫謀始危言防萌屯難慮終竭節以身許國其誠動
天夫爵有德封有功眷彼茂勤宜弘賞典以桓榮之
稽古況蕭何之指縱是用欽若朝經差其井賦說可
封燕國公食實封三百戶無量可右散騎嘗侍兼國

子祭酒封舒國公食實封三百戶

開元二年四月戊午進封郭虔瓘爲太原郡開國公食邑二千戶封郭知運爲介林縣開國公食邑一千戶以賞功也制曰賞有功報有德者政之急也若功不賞德不報則何謂哉右驍衛將軍兼北庭都護瀚海軍經略使金山道副大總管招慰營田等使太原縣開國子郭虔瓘右驍衛中郎將簡較伊州刺史兼伊吾軍使郭知運等早負名節見稱義勇頃者抑中金蒲偏師禦敵蕭條窮漠之外奔迫孤城之下疆寇益侵援兵不至既守而戰背秋涉冬櫪馬長嘶戍人

遠望謀以十勝成其九拒遂能摧日逐之遺種斬天驕之愛息豈耿恭班超獨高前史將廉頗李牧與朕同時眷言茂勲是所嘉歎信可疇其并邑昭示遐邇俾勞臣勸而懦夫立焉庚申又以虔瓘爲左驍衛大將軍知運爲右驍衛將軍仍賜衣一襲以崇其寵九年夏四月庚寅胡賊康待賓據長泉縣作逆秋七月己酉擒待賓至京師腰斬之己丑朔方道行軍大總管兵部尚書清涼縣開國男王琚進封清源縣開國公食邑一千戶兼與一子官賜物五百匹天興軍節度大使右羽林軍將軍簡較并州長史攝御史大

夫燕國公張說與一子官賜物一百匹天興軍蕃漢
討擊使特進史獻與一子官賜物二百五十匹賞平
胡之勲也十月癸未以攝左羽林軍隴右防禦使薛
訥爲右羽林軍大將軍上柱國封河東郡開國公賜
物三百段銀五百兩錢三萬貫賞功也以隴右防禦
副使雲麾將軍左羽林軍將軍介休縣公郭知運進
階冠軍進封太原郡公仍兼臨洮軍使賜物三百匹
錢三十萬銀四百兩左武衛將軍清涼縣侯白道恭
進封清涼縣公賜物二百匹錢二十萬銀二百兩以
右威衛將軍杜賓客爲靈州刺史充豐安軍使封建

平縣開國男賜物二百段銀二百兩錢二十萬右監
門衛將軍臨洮軍使安思順爲洮州刺史充莫門使
賜物二百段銀三百兩錢五十萬右威衛郎將楊楚
客爲右領軍衛中郎賜物二百段錢十萬銀二百兩
並賞破吐蕃之功也

十七年三月瓜州刺史墨離軍使張守珪沙州刺史
賈思順領伊沙等州兵入吐蕃大同軍大破吐蕃驅
剪不可勝紀帝降書謂守珪曰吐蕃小寇干我邊鄙
類經喪屺竟不悛懲卿等早懷勇烈久司戎旅各効
忠誠暗申計略遠聞決勝嘉慰良深守珪及思順並

宜賜紫其立功人敘錄具狀奏聞必須據實勿使踰
濫今內出緋紫袍卿等領取量功分賞其被傷人仍
給醫藥使得安全陣亡人具名錄奏當加優贈

二十三年十二月命十道採訪使舉良刺史縣令以
陝州刺史崔希逸潞州刺史宋昇濮州刺史趙冬曦
越州刺史元彥冲澤州刺史李植洛州刺史徐嶠之
易州刺史盧暉莫州刺史鄭倩之隴州刺史武崇節
廬州刺史竺承構嵩州刺史許齊物江州刺史李尙
辭河南府陸渾縣令李嘗河南府長水縣令乙速狐
令從陝州河北縣令李抗懷州脩武縣令唐昭明京

兆府高陵縣令裴廻京兆府盩厔縣令戴休琬京兆
府奉先縣令李知止京兆府涇陽縣令韋伯祥太原
府祁縣令李志遠太原府清源縣令高播蒲州永濟
縣令裴肫解縣令李戒之齊州臨邑縣令上官貢涇
州定安縣令王履進涪州邯鄲縣令畢彥孫趙州平
棘縣令霍栖梧梓州射洪縣令王休言蘇州崑山縣
令李叔括州括蒼縣令祝紹荊州當陽縣令趙廣微
荊州松滋縣令李修荊州枝江縣令董琅襄州安養
縣令李泳等聞上降書宣慰刺史各賜帛八十匹縣
令五十匹勅之曰卿等各能用心副朕所委今茲歲

會風政有歸是用激揚以勵清操

天寶三年制唐元功臣締構之初竭其忠款錄功念舊情所不忘普恩之外更加一階其身沒者各贈一官

十三年三月隴右節度使哥舒翰破吐蕃洪濟人莫門等城并牧九曲其將咸來策勳翰採撫具奏乃以隴右十將特進兼右金吾衛員外大將軍兼大拔州都督燕王郡王火拔歸仁加驃騎大將軍餘如故河源軍使左武衛員外大將軍王思禮隴右兵馬使右武衛員外大將軍彭元曜並如故加特進隴右同節

度副使右羽林車員外大將軍張擢隴右都虞侯左武衛員外大將軍兼安鄉郡太守管崇嗣隴右同節度副使右武衛員外大將軍兼漢門軍使臨洮郡太守成如璆隴右同經略副使右金吾衛員外大將軍兼寧塞郡太守康承獻隴右討擊副使右領軍衛員外大將軍魯炤右領軍衛員外大將軍兼高蘭府都督渾惟明並加雲麾軍將軍如故積石軍使藏奉忠為左金吾衛員外大將軍鎮西軍使郭光朝為右金吾衛員外大將軍河西經略副使蘇法昇為威衛員外大將軍隴右討擊副使郭英乂彭體盈並為左羽

林軍員外將軍並充本道驅使以安西節度使衛尉少卿員外置同正員兼安西副大都護攝御史中丞封清有功進加六階自朝議大夫授銀青光祿大夫仍遷鴻臚卿員外置同正員攝御史大夫餘如故並與一子五品更與一子官亡父亡母妻並加追贈及賜莊宅各一所

肅宗至德二年十二月大赦天下詔乘輿幸蜀天步多艱人心且搖臣節斯見太子太師幽國公韋見素開府儀同三司內侍監齊國公高力士開府儀同三司右龍武大將軍潁川郡公陳玄禮開府儀同三司

左龍武大將軍田長文開府儀同三司右龍武大將軍張崇俊右龍武大將軍杜休詳等勇不顧死危能致命或竭誠羽翼仰北辰而環拱或叶契心膂聚東井以全歸疇其錫社之封永以誓河之義見素加開府儀同三司實封三百戶力士加實封三百戶玄禮進封蔡國公實封三百戶長文進封鴈門郡公崇俊進封南陽郡公休詳進封馮翊郡公各實封二百戶朕恭承天罰誓兵朔野幸興一旅之衆遂成九有之師言念經綸豈忘締構銀青光祿大夫尚書右僕射裴冕識字冲深體局貞固輸忠佐命肇啓興王加開

府儀同三司封冀國公食實封三百戶光祿大夫殿
中監同正員判行軍李輔國志除君惡忠誠濟危加
開府儀同三司殿中監依前判行軍事封成國公實
封五百戶銀青光祿大夫宗正卿兼工部侍郎李遵
義切維城勲參定國加特進封鄭國公實封二百戶
開府儀同三司兼鴻臚卿同正員中軍都知兵馬副
大使管崇嗣能訓戎律以佐兵權進封鉅鹿郡公實
封二百戶中軍都虞侯特進鴻臚卿同正員李昇加
開府儀同三司進封保定公加雲麾將軍右武衛大
將軍右羽林軍宿衛內供奉王兢加特進太原縣侯

仍各封實封一百戶自寇戎姦宄王師未振瞻言京
國尚聚犬羊廣平王倣脩學好古令德孝恭志存邦
家誓雪讐恥爰鞠其旅元戎啓行可封爲楚王食實
封二千戶銀青光祿大夫尚書左僕射兼武部尚書
同中書門下平章事兼靈武大都督府長史單于安
北副都護持節充朔方節度使六城水運朔方管內
採訪處置使郭子儀才光三傑功格十臣克焯皇威
載昌大業加司徒兼尚書左僕射進封代國公食實
封二千戶平章事已後並如故開府儀同三司兼鴻
臚卿同正朔方左廂兵馬使同節度副使姑臧縣伯

僕固懷恩進封豐國公食實封二百戶開府儀同三司兼右金吾衛大將軍同正仍充四鎮伊西北庭行軍兵馬使李嗣業履險忘軀破敵極難兼衛尉卿同正封號國公食實封二百戶銀青光祿大夫守司徒兼戶部尚書同中書門下平章事兼御史大夫鴻臚卿太原尹北京留守河東節度副大使薊國公李光弼全德挺生英才間出干城禦侮坐甲安邊可司空兼兵部尚書門下平章事進封鄭國公食實封八百戶開府儀同三司御史大夫兼工部尚書持節充招討西京并定威武武興平等軍兼關內節度河西隴

右伊西四鎮行營兵馬使王思禮養銳先鳴蓄奇後殿可開府儀同三司行工部尚書兼御史大夫封霍國公食實封五百戶光祿大夫太常卿司正兼御史大夫淮南西道節度採訪使潁川太守來瑱可開府儀同三司兼御史大夫封潁國公餘如故特進太僕卿南陽太守兼御史大夫權知襄陽郡事金鄉縣公魯炤蘊是韜略副茲臨制可開府儀同三司兼御史大夫封祁國公仍各食實封二百戶兼京兆尹持節充京畿採訪計會招召宣慰處置使崔光遠毀家成國致命前茅可特進行禮部尚書封鄴國公食實封

三百戶開府儀同三司李光進慎固封守克獻殊勳
封范陽郡公食實封二百戶賢非后不享后非賢罔
又社稷之固必在良臣左相苗晉卿忠不忘君才惟
濟代弼成大業保乂王家可特進行侍中封韓國公
食實封五百戶憲部尚書同中書門下平章事李麟
蘊德成務含貞軌物發輝帝業潤色皇猷可金紫光
祿大夫刑部尚書同中書門下平章事封褒國公銀
青光祿大夫中書侍郎同中書門下平章事崔圓允
釐庶績康濟多難克清天下大庇生人可特進行中
書令封趙國公食實封五百戶朝散大夫守中書侍

郎同中書門下平章事河南節度採訪使賜紫金魚
袋張鎬謀猷惟允綱紀立程惣茲戎律懿是謀府封
南陽縣公餘並如故銀青光祿大夫太子少師房琯
嘗以經術輔導朕躬加金紫光祿大夫清河郡公銀
青光祿大夫少保嗣虢王巨頃以宗枝居守京邑加
光祿大夫御史大夫越國公岷兼惣元戎克寧全蜀
可金紫光祿大夫戶部尚書銀青光祿大夫守文部
尚書郇國公韋陟持衡流品式敘百工可金紫光祿
大夫吏部尚書銀青光祿大夫禮部尚書李峴饋運
周洽開物成務可光祿大夫行御史大夫兼京兆尹

封涼國公大中大夫文部侍郎賜紫金魚袋蘇震供
億蒸徒臨事益辨可銀青光祿大夫行吏部侍郎
代宗大曆二年二月以前同華節度使左廂兵馬使
試殿中監姚懷爲開府儀同三司試太嘗卿封感義
郡王依舊內飛龍射生供奉前同華節度使隨身試太
嘗卿李延俊爲特進封承化郡王賞戮華州叛將周
智光功也

德宗建中二年十二月庚寅加河中節度馬燧簡較
尚書左僕射加澤潞節度李抱真簡較兵部尚書賞
破田悅之功也先是悅遣將康愔領兵圍邢州糧餉

路絕刺史李洪堅壁自守賊不能陷賊將楊朝光又
率衆二萬圍臨洛其守將張仵亦堅拒之賊竟不能
攻取乃樹柴爲營以禦官軍燧與抱真及神策將李
晟合勢救之大敗賊於雙置斬楊朝光傳首京師擒
其大將盧子昌燧等乘勝進軍又破悅於臨洛故燧
等加官又加洪兼御史大夫仵簡較太子賓客兼御
史中丞

三年五月丁酉加河東節度使簡較左僕射馬燧同
中書門下平章事澤潞節度使李抱真簡較尚書左
僕射河陽三城節度使李芑簡較兵部尚書神策行

營招討使李晟簡較右散騎嘗侍實封一百戶賞破田悅功也

興元元年春正月癸酉德宗在奉天行在宮受朝賀畢大赦改建中五年爲興元元年制應赴奉天并進收京城將士並賜名奉天定難功臣身過犯逋減罪三等子孫犯減罪一等諸道將士在行營並超三資改官仍各賜勳五轉在本鎮者依資與改官各賜勳三轉内外文武官三品已上賜爵一級四品已上各加一階仍並賜勳兩轉

五月李晟等收復京師六月乙酉簡較左僕射平章

事充神策軍節度等京畿商華等州副元帥合川郡王李晟加司徒兼中書令仍賜實封一千戶所司擇日冊拜加華州潼關節度使駱元光簡較右僕射賜實封五百戶加神策軍行營京畿商州節度使尚可孤右僕射賜實封五百戶以簡較太子詹事兼御史中丞田希鑿爲簡較工部尚書兼涇州刺史御史大夫四鎮北庭行軍涇原軍節度使七月辛卯赦書收京城將士超八資改轉已甄敘者更與超三資扈從及收京將士及嘗參官祖父母在先無官封量授致仕官及邑號已亡者與追贈扈從將士三品已上賜

爵兩級四品已下各加兩級贈勳三轉諸州刺史普
恩外賜爵一級諸道鎮軍及行營將士三品已上賜
爵一級四品已下加一階

九月乙亥加成德幽州盧龍等軍節度使簡較司空
平章事王武俊簡較司徒平章事賜實封五百戶加
昭義軍節度使簡較左僕射平章事李抱真加簡較
司空平章事加實封五百戶以破朱滔等功褒之也
貞元二年四月甲申詔曰李希烈棄義背恩窮姦極
暴謂神器可以力取謂生靈可以詐欺志在兇殘躬
行僭竊罪無與比法所難容朕以君德不脩致人於

禍究其端本過實在予恐使蒸黎重相攻戰屢施詔
命務欲懷柔抑羣帥奮發之誠駐諸軍討逐之勢不
憚屈已期於息人希烈曾無悛心益逞驕志虐毒滋
甚吞噬無厭惡貫既盈自底夷滅開府儀同三司兼
御史中丞陳仙奇忠勇有謀沉毅能斷據合境受汗
之憤導三軍思順之心唱義一呼羣情嚮附廓清氛
祲蕩穢渠魁驛書上聞函首入獻方隅旣乂戍役其
休懸賞之科是宜必信可簡較工部尚書兼蔡州刺
史御史大夫淮西節度使仍賜實封五百戶將士等
委仙奇即以諸色官錢優與宴設其中首建謀議同

斬希烈人等宜並條錄聞奏節級褒賞

五月詔淮西接界州縣本軍鎮守及諸道赴行營將士等宜共賜物二十萬端匹以充賞設仍委本道條錄聞奏並與甄敘其行營將健各放歸本道明加宣諭令悉朕懷

十年十二月以靈州懷遠將士所破吐蕃收獲羊馬衣物宜分賞有功將士自今已後並宜從此

十二年宣武軍節度李萬榮疾病置其子廼爲兵馬使廼殺大將爲亂都虞侯鄧惟恭等執送京師帝以東都留守董晉爲節度詔汴州將士等志堅金石節

勵冰霜叶奉那家咸懷憤激不受熒惑同疾姦兇就縛軍中傳獻闕下勲庸特茂遐邇所知宜獎忠勞各加優賞並與進改仍委董晉一月內具名聞奏仍共賜錢三十萬貫委董晉逐便即取鹽鐵轉運使錢物各給宣武軍節度都虞侯兼御史大夫鄧惟恭都押衙兼御史大夫杜皓大將王應鳳曹元偁楊燕竒劉惟清成文朝陳沛張庭芬薛文翰趙藏用李庭光宇文澹李國信等並竭忠効誠績用昭著惟恭可簡較左散騎嘗侍依前兼御史大夫賜實封一百二十戶子一七品正員官并賜物四百疋杜皓英幹並可右

散騎嘗侍依前兼御史大夫應鳳已下各加官賜物
押衙賈庭芬及同節度副使十將等二百六十三人
並優與改官

憲宗元和二年十月潤州將張子良李奉先田少卿
裴行立等生擒逆賊李錡制曰天地之德佐助者忠
良鬼神之靈斃陪者盈貫故有無狀之釁顛越以敗
嘗則有不奪之誠感慨以明節易所謂功業見乎變
書所謂不善降百殃積惡必至於滅身見機寧俟於
終日應若影響昭然著明李錡受恩三朝受任千里
勺水拳石以至高深潤草塗原豈酬亭毒而棄我厚

德稔其姦心滔天以肆其逆謀擢髮未窮其醜行乃
者式舉戎旆申嚴國刑將鼓雷霆之威以誅梟獍之
罪鎮海軍左廂兵馬使兼御史中丞張子良等外弘
治慮內激精忠環甲執兵取凶人之柄瀝肝嘗膽懷
勁草之風迴戈以掩其羽毛竟夕遂擒其魁眷天府
無一金之費已靜江流王師無一戰之勞已除人害
莫大之節卓然無倫非常之功斯謂不朽高位重賞
予何愛焉殊加寵榮顯示旌勸其張子良等超異酬
賞並從別勅處分其立功將士等并淮平西川節度
例優賞甄敘其左廂官健等素聞效順亦宜霑賞亦

並從別敕處分十一月丁亥以子良為特進簡較兵部尚書兼左金吾衛將軍御史大夫賜上柱國進封南陽郡王食實封一百五十戶改名奉國兵馬使兼御史中丞田少卿為特進簡較右散騎嘗侍左羽林軍御史大夫仍封代國公食實封一百五十戶兵馬使兼侍御史李奉先為特進簡較右散騎嘗侍又羽林將軍御史中丞仍封邠國公食實封一百五十戶四年以左羽林將軍田少卿為左金吾衛將軍右羽林將軍李奉先為右金吾衛將軍稱賞擒李錡之功也又以左羽林將軍張承金為右神武大將軍知軍

事稱賞擒楊惠琳之功也

五年四月以昭義軍都知兵馬使潞州左司馬兼御史中丞烏重裔為懷州刺史兼御史大夫充河陽三城懷州節度等使以節度使盧從史潛通鎮州王承宗重裔鎮撫軍情無變行賞典也以前昭義將王翊元起復左龍武軍將軍知軍事王獻為右神武軍將軍知軍事以功次重裔也

烏重裔故為潞州諸將會盧從史奉詔討賊嘗懷異志潛與王承宗通連吐突承璀以神策軍行營與從史對壘將圖之重裔通其謀竟縛從史於帳下於時重裔職總牙門是日戒嚴其軍莫敢動者事聞朝廷推重裔自都將兼潞州左司馬拜懷州刺史兼御史大夫河陽三城節度

十八年八月東都防禦使呂元膺奏淄青節度使留
郛伏甲作亂初李師道置郛於河南府兵謀雜以往
來更不敢辨因吳元濟北犯郊畿多警防禦兵盡戍
伊闕師道潛以數千百人兵內郛謀焚宮闕而肆殺
掠旣烹牛饗衆矣明日將出會有卒楊進李再興者
謁元膺告悉數日盡獲之賜楊進李再興各錦綵三
百匹宅一區授以郎將及典軍仍送西川收管
十一年正月詔討鎮州王承宗乙亥幽州奏破下武
強縣真寅授幽州將朱泗等五人刺史敘武強功也
二月以內庫緡絹四萬匹賞幽魏戰士

十二年十月乙卯淮西平甲申制收蔡州擒吳元濟
節度使及諸大將並從別敕處分諸立功將士委韓
弘裴度與行軍節度使及諸節度使計會速條流等
第聞奏即有甄昇其賞物已令節級優厚支遣十二
月丙辰朔壬戌制加彰義軍節度申光蔡澂觀察使
充淮西宣慰處置等使朝議大夫門下侍郎平章事
兼蔡州刺史飛騎尉裴度金紫光祿大夫依前門下
侍郎平章事弘文館大學士仍賜上柱國封晉國公
食邑三千戶以馬惣爲簡較工部尚書蔡州刺史蔡
申光節度等使又制加以唐鄧隨等州觀察使通議

大夫簡較左散騎嘗侍鄧州刺史李愬可銀青光祿大夫簡較尚書左僕射襄州刺史充山南東道節度襄鄧八州觀察等使賜上柱國封涼國公食邑三千戶并賜實封五百戶與一子正員五品官韓弘加兼侍中李光顏烏重裔并簡較司空光顏封武威郡公重裔邠國公以亘武軍都虞候韓公武簡較左嘗侍充鄜坊丹延節度等使魏博行營兵馬使田布爲右金吾將軍並敘平寇之功也

十一月甲午以隨唐兵馬使李祐爲神武將軍知軍事仍賜莊宅各一所米粟二百石錄平蔡功也

十五年邠寧節度使李光顏來朝制曰寰寓以清而兵不可失干戈再戢而功不可忘爰升經武之材用輔同文之理具瞻此允注意尤深蓋以獎舊勞而申賞典也李光顏稟忠厚仁信之資服禮樂詩書之訓沉勇有決剛嚴不殘挺長劍之鋒稜蓄殷雷之氣象以忘身殉節爲任以約已率衆爲心屬先帝撫運勤人墾蓄除害能展七擒之畧以成四克之功方夏甫寧凱還未幾驅仍歲陷堅之士爲盛秋乘障之師果逐奔戎載完危壁西絕夷落威名赫然念茲勲庸當極寄任是以徵自保塞接于明庭亟聞弘遠之規復

挹冲深之度固可以內參鈞軸外惣麾旗憲被萬邦
叶予一德可不勉歟可簡較司空同中書門下平章
事依前邠寧節度等使帝以光顏功冠諸將及徐泗
李勣尅平淮夷故皆召赴闕宴賜優洽已而皆帶宰
相出鎮所以報勲臣也帝又御麟德殿宴光顏及勣
各賜錦綵五百匹銀瓶盤等五事衣一襲馬一疋賓
佐將校頒賜有差

穆宗以元和十五年卽位二月御丹鳳樓大赦詔興
元奉天功臣及蔡鄆立功將士普恩之外更賜勲爵
亡歿者與追贈

長慶二年二月詔雪鎮州王承宗以左神策行營樂
壽鍾兵馬使傅良弼爲沂州刺史以瀛州博野鍾迥
使李寰爲沂州刺史皆酬勞也良弼寰所鍾介居燕
趙而二叛啗之以利脅之以威屢趣其降各以一族
之衆堅壁不戰賊竟不能取故賞之也

八月誅李介汴州平於是以義成宣武兩軍節度檢
校右僕射韓充爲簡較司空兼汴州刺史充宣武軍
節度汴宋毫等州觀察處置等使忠武軍節度簡較
司空平章事李光顏進位簡較司空兼侍中武寧軍
節度使簡較工部尚書王智興進位簡較左僕射以

充海沂密節度使簡較工部尚書曹華爲簡較右僕射兼滑州刺史充義成軍節度鄭滑潁等州觀察處置等使以宋州刺史高承簡爲簡較左嘗侍兼兗州刺史充充海沂密等州節度觀察處置等使以汴州防城兵馬使李質爲右金吾衛將軍以亳州刺史田穎爲宋州刺史並策勲也又內出綾絹三十萬足付度支充諸軍賞物

敬宗長慶四年卽位四月丙申有染坊供人張韶結染工無賴之徒百餘輩犯右銀臺門入宮帝在清思殿擊毬聞警將出幸右神策軍左右皆曰盜入宮未

知參募右軍遙遠道路可虞不如幸左軍之速至也遂幸左神策軍初帝嘗寵右軍中尉梁守謙每遊幸宴樂兩軍或相誇耀多加守謙之勝而左軍軍士時以爲言京師頗傳其事及帝違難至左軍中尉馬存亮匍匐出迎捧帝足嗚咽涕泣自負帝入軍中帝極慰悅旣安堵存亮又令大將軍康藝全率騎卒入宮討賊與右軍兵馬使尚國忠引兵合擊賊衆殲焉賜康藝全尚國忠等錦綵銀器有差并共賜左右殿前軍官徒錢一千貫文五月己未以藝全加簡較工部尚書兼御史大夫旌討賊之功也庚申賜存亮實封

二百戶

文宗太和二年十一月壬辰詔曰王者誅暴亂賞勲勞既正紀綱式頒爵位朕以菲德理乖勝殘使孽生海盜刑用戎鉞屬者庭奏用滄州爲輔軍以謀專土同捷持棣州爲屏扞遂成阻命寔賴英帥共恢壯圖爰議疇庸式獎宣力武寧軍節度使徐泗豪等州觀察處置等使充滄州行營招撫使光祿大夫守司中書門下平章事上柱國太原郡開國公食邑二百戶王智興可特進封代國公食邑三千戶餘如故平盧軍節度使淄青登萊棣等州觀察處置等使兼押

新羅渤海爾番等使銀青光祿大夫簡較尚書僕射御史大夫上柱國會稽縣開國公食邑一千戶康志睦可簡較尚書左僕射餘如故正議大夫簡較工部尚書使持節鄆州諸軍事兼鄆州刺史御史大夫賜紫金魚袋崔弘禮可簡較尚書右僕射餘如故其棣州城下武寧軍節度使諸道立功將士已甄錄外委智興條疏聞奏棣州應見在百姓宜復一年其將士有決戰攻壘奮不顧身中亦被瘡遂成廢疾者病賜衣糧終身勿絕其武寧軍及平盧軍浙西宣歙天平等五處兵馬在棣州城下者並宜放歸本道於戲並

命申威分疆剪寇界天河之南北委藩守以廓清立績者既以勞施圖功者方期盡敵勉弘勝策無至老師共臻輯寧副我勤屬

是年討滄州叛將李同捷十月勅魏博新平原將士須有賞給宜賜綾絹五萬匹綿二萬

三年五月滄州李同捷平詔齊德將張慶旻等十三人鄭滑將李著等五人並進官級賜幽州綾絹共二十萬疋德州十五萬疋充賞軍士

九年十二月丙子賜鳳翔軍將李叔和莊宅各一區銀三千兩綾絹七十疋以斬鄭注功也

懿宗咸通十一年二月勅征討徐州將士等委吏部度支頒獎有差

昭宗文德元年即位秦宗權被執蔡申光等州平詔賜蔡州行營兵士錢二十五萬貫令度支逐近支給

後唐莊宗初為晉王祐十四年二月契丹攻幽州命諸將進討八月辛丑獻捷于鄴九月班師帝以橫海軍節度使李存審檢校太傅邢洛節度使關資檢校太尉並平章事方鎮如故將士賞給有差

同光元年四月即位制曰應六軍及行營馬部蕃漢諸道將較兵士等皆以身先冒刃志切勤王或竭節

於忠勞或連年而征戍須加恩獎倍撫苦辛其將較並賜功臣名仍未有官者即超一資與檢校官已有官者亦超資加官已官者與加爵邑如曾封爵者即給一子六品正員官其長行兵士并賜功臣名應將士等並勒逐處各定等第優賞

十月制曰懋德賞功百王明訓疏封列爵有國通規應扈從征討將較及諸官員職掌軍將節級馬步兵士及河北諸處屯駐守戍兵士等皆情堅破敵業茂平讐副予勘定之謀顯爾忠勤之節並據等第續議

獎勵

二年二月南郊禮畢制曰賞不失勞百王令典人惟求舊有國通規當宜廣示優恩務酬嘉績應自來立功將較兵士等皆久經戎陣備觀辛勤並宜各轉官資仍加賞給

三月詔隨駕收復汴州并扈從到洛及南郊立仗都將已下至節級長行軍將等朕自削平諸夏掃蕩羣兇被介冑以征行歷星霜而扈從凡經百戰盡立殊功未念丹心真同赤子若無旌賞豈表恩榮其都將官員司空已下者宜並賜協謀定亂輔國功臣自僕射尚書嘗侍至大夫中丞宜並賜忠勇拱衛功臣其

初帶憲銜宜並賜忠烈功臣已有功臣名者不在此
限其節級長行軍將並宜賜扈蹕功臣

明宗以同光四年四月即位改元天成制曰鄴都赴
難之際定策功臣宜特加恩以彰豐報其扈從將士
及六軍諸衛諸道行營將較等委中書門下次第甄
獎

是月齊州防禦使安審通加檢校太傅食邑四百戶
鄴都馬步軍都指揮使李正綱加檢校司空湖州刺
史賜竭忠建策興復功臣賞盧臺之功也

時盧臺戍軍亂害副
招討寧國軍節度使烏震
正剛尋與審通斬殺亂兵

七月宋州節度使王晏球與護駕親軍都指揮使張
虔釗攻定州帝令中使押御馬二匹賜晏球虔釗

三年六月招討王晏球獻曲陽之捷令殿直陳知隱
押銀腰帶鞍轡賜北面立功將校

時帝在汴王晏球
討定州王都故也

十月甲子安州上言屯駐左神捷右懷順兵士作叛
主帥高行珪襲殺出城命使賜行珪鞍馬御衣寶帶
及賜都將已下有差持行珪預覺其事遂潛移鎧甲
於別室叛卒果先奔其庫行珪有備乃能禦之

是月代州刺史檢校司空張勗超授檢校太保初契
丹主赴援太原代州張勗忻州丁審琪守城蕃軍由

城下過都不誘迫時端明殿學士呂琦在忻州及洪奉殿直四五人州兵僅千人琦謁審琪口虜勢經城不問可見其心迴日必無全理與使君率在城軍民入五臺避虜於鎮州界策之上也審琪從之翌日詰且琦等遣人會審琪拒關不納軍士欲攻牙城琦曰家國如斯自相屠害非人情遂率州兵趨真定審琪即日降契丹唯劄屢煞虜族帳故超授獎之

四年二月辛亥下制曰朕嘗披國史備閱軍功裴度之破淮西無遺廟筭石雄之攻山北益展皇威莫不仰遺烈於祖宗委全才於將相而自中山逆命外域

朋姦奪戎旅以鷹揚屠賊城而魚爛夕聞告捷明賞殊勲竭忠建策興復功臣北面行營招討歸德軍節度宋亳單穎等州觀察處置亳州太清宮等使權知定州軍州事特進檢校太傅同中書門下平章事使持節宋州諸軍事宋州刺史上柱國琅琊郡開國侯食邑一千戶王晏球長劍倚天洪河帶地居萬夫之長擅三傑之名黃石兵書運子房之籌略清淮公族興仲爽之源流自統雄師往收逆壘摧曲陽之堅陣厭澁水以驚波爰築室以反耕攻圍雉堞果折骸而易子傾覆鳥巢招降之士庶數千撲之兇狂非一王

都授首禿餒生擒火焚而惡蔓皆除雷掃而妖氛併息諒茲丕績宜降優恩廼眷汝陽實惟巨鎮搃夫牙之內地當馬頰之要津是命疇以勲庸福其黎庶進公國之品秩崇藩后之等威俾濬鳳池仍加蟬冕帷幄共推於重席井田兼別於真封於戲解甲休兵實歸於上將安民和衆議伏於賢臣永保令猷無替朕命可依前檢校太傅兼侍中使持節鄆州諸軍事守鄆州刺史充天平軍節度齊棣等州觀察處置使仍進封開國公加食邑一千五百戶食實封一百戶行營副招討橫海軍節度觀察等使守滄州刺史李從

敏可光祿大夫檢校太保使持節定州諸軍事守定州刺史充義武軍節度觀察北平軍等使進封開國伯加食邑一千二百戶北面行營兵馬都監鄭州防禦使張虔釗可光祿大夫檢校司徒使持節滄州諸軍事守滄州刺史充橫海軍節度觀察等使仍封清河縣開國子食邑五百戶又制朕聞魏絳和戎始克諧於金石祭遵征虜終併息於烟塵此乃先務懷柔後申禁暴明國家之耀德表藩翰之圖功旣立丕勲宜加懋賞興邦守正翊贊功臣盧龍軍節度管内觀察處置押奚契丹兩藩經略盧龍軍等大使特進檢

按太尉同中書門下平章事幽州大都督府長史上
柱國天水縣開國侯食邑一千戶趙德鈞崆峒稟氣
渤澥融精傳相略於黃公受兵符於玄女而自羈縻
戎馬控制盧龍洞曉蕃情飽諳邊事獲其五利嘗姑
息於鮮卑運以六韜果生擒於楊隱可謂坐籌帷幄
能執干戈終殄寇於中山永摧兇於外域犬羊南牧
賴掃蕩於尋時貔虎北征遂凱旋於此日加以民軍
胥悅畏愛並行薊門之人物如初燕谷之粢盛畢備
得不籌其庶績褒以徽章就加進律之文式叶陟明
之典是命寵頒鳳綵榮列貂冠正爵位於三公加并

田於千戶貴申殊渥仍賜真封於戲事君之節已彰
燕山紀頌教子之方大著踐土臨戎有國有家惟忠
惟孝享茲具美永保令猷可依前檢校太尉兼侍中
幽州大都督府長史充盧龍軍節度觀察等使進封
開國公加食邑五百戶食實封一百戶乙卯以前洛
州團練使張進爲鄭州防禦使泰州刺史安叔千爲
涿州刺史薊州刺史潘環爲易州刺史淄州刺史
張從本爲隰州刺史簡州刺史李思議爲磁州刺史
賞中山之功也

時定州帥王處直養子王
都劫殺處直嬰城以叛

四月以龍武都虞侯北面行營諸道左廂馬軍都指

揮使符彥卿爲耀州團練使神武都虞侯北面行營
右廂馬軍都指揮使守端州刺史高行周爲潁川團
練使賞中山之功也

長興三年七月丁酉雲州節度使沙彥珣奏桑遷謀
應太原遷報應州尹暉謀逐殺沙彥珣暉復部送遷
至伏罪遣太子賓客聶延祚宣賜彥珣尹暉戎服金
帶錢幣及犒賞在城軍士

末帝清泰元年五月辛亥以隨駕嚴衛指揮使領費
州刺史尹暉爲齊州防禦使捧聖都指揮使繡州刺
史康進海爲曹州刺史先是尹暉進海與楊權始構
軍入城奉帝故也

晉高祖天福三年九月己巳復魏府節度使范延光
官爵庚午遣客省使李守貞押器幣賜魏府立功將
校

六年八月壬寅制朕頃當開創爰在并汾或傾歸順
之心首謀推戴或擁驍雄之旅力效扶持洎汜水興
妖艷城伐罪每令致討皆立竒功漸臻開泰之期愈
念艱危之節宜頒殊渥允答茂勲應河東起義之初
佐命効順及收復鄴都汜水立功臣僚將校等並與
加恩

少帝開運二年正月甲辰以青州平詔行營將校自副兵馬使已上各賜功臣名號是月宴青州立功將校於永福殿賜李守貞符彥卿王帶衣一襲衣著銀器鞍轡馬散馬都監王景崇護聖廂主王喬揚實都指揮使靳霸等各等第賜金銀帶衣服段疋銀器等周太祖以漢乾祐二年自河中征趙綰至華州趙暉報蜀軍盡退郭從義進攻有日即統衆言旋正月五日夜賊水砦內勁將王三鐵者領千人突出河西攻白文珂砦時文珂出迎帝唯劉詞葉仁魯等在砦賊三道齊入殺聲動地會賊發火洞炤内外力戰敗之

歿者僅七百人劫日帝至劉詞馬前請罪帝曰吾嘗懸料正疑此事彼技殫矣賴兄果敢不爲虜嗤以鞍馬衣服幣帛勞之八日帝至西砦犒設以縑帛銀器分遣戰傷將士

廣順元年正月即位制曰馬步諸軍將士等戮力推誠輸忠效義先則平持內難後乃推戴朕躬言念勲勞所宜旌賞其員僚將士等各與等第超加恩命仍賜功臣名號已有功臣名號者別與改賜

四月乙未以蔚州刺史姚武爲申州刺史蔚州刺史張昭瑀爲博州刺史蔚州刺史劉洪爲衛州

刺史蒯萊州刺史符彥熊爲耀州團練使前淄州刺史藥元福爲陳州刺史皆以平徐方預軍功也
二年二月丁亥朔以晉州巡檢使前密州防禦使王萬敢爲復州防禦使晉州節度副使領忠州刺史馬延翰自檢校刑部尚書加檢校右僕射餘如故皆獎拒并寇城守之功也戊子龍捷右第五軍都指揮使檢校司徒領連州刺史史彥超加大保進爵伯加食邑三百戶虎捷第五軍指揮使檢校司空領秀州刺史何徽加司徒封太原縣男食邑三百戶亦以固守晉州之功也

世宗顯德元年三月親征河東庚子制以侍衛馬步都虞侯李重進兼忠武軍節度使宣徽南院使向訓兼義成軍節度使殿前都指揮使張永德兼武信軍節度使以義成軍節度使白重贊爲保大軍節度使以鄭州防禦使史彥超爲鎮國軍節度使賞高平之功也又以建雄軍節度使藥元福爲同州節度使以宣徽北院使楊廷璋爲建雄軍節度使以同州節度使張鐸爲彰義軍節度使以內客省使吳延祚爲宣徽北院使以龍捷左廂都指揮使李干爲遼州防禦使以龍捷右廂都指揮使康延治爲萊州防禦使以

虎捷左廂都指揮使田瓊為密州防禦使以虎捷右
 廂都指揮使張順為登州防禦使以龍捷第三都指
 揮使孫延進為鄭州防禦使以前耀州團練使符彥
 能為澤州防禦使又以散員都指揮使李繼勳為殿
 前都虞侯以殿前都虞侯韓令坤為龍捷右廂都指
 揮使以鐵騎第一軍都指揮使趙宣祖廟諱為龍捷右廂
 都指揮使以散員都指揮使慕容延釗為虎捷左廂
 都指揮使以控鶴第一軍都指揮使趙晁為虎捷右
 廂都指揮使五人并遙授團練使其餘轉改有差
 四月討太原回詔潞州昨經圍閉將投官吏職員同

力守禦兼以大駕駐蹕迎奉無闕應在城將校官吏
 職員宜令本州具名銜以聞各加恩澤

五月乙酉以忻代招收指揮使秦珣為歸州刺史初
 符彥卿之入賊境也孟縣偽監押楊貴殺巡檢使趙
 筠以戍兵數百來降彥卿因請建孟縣為州上可之
 遂以歸州為名命楊貴為刺史至是以秦珣代之珣
 本太原東山之賊帥也廣順初與其黨趙行能等內
 附朝廷置忻代一路招收都指揮使遙授忻州刺史
 趙行能副之自是賊之東境常為珣等所苦劉崇患
 之竟不能制代州鄭處謙之歸命也蕃寇在郊我軍

未至珣遣弟州帥兵三百以戍之帝嘉其誠節故有
郡邸之授

六月車駕征河東回乙亥制以天雄軍節度使檢校
太師守太保兼中書令大名尹衛王符彥卿爲守太
傅仍封魏王以天平軍節度使檢校太師兼侍中郭
從義爲中書令以河陽三城節度使檢校太尉同中
書門下平章事劉珣爲兼侍中行京兆尹克永興軍
節度管內觀察處置等使以昭義軍節度使檢校太
尉同中書門下平章事李筠爲兼侍中以河中護國
軍節度使檢校太尉同中書門下平章事行河中尹

王彥超爲兼侍中克忠武軍節度使許蔡等州觀察
處置等使以忠武軍節度使兼侍衛馬步軍都虞侯
檢校太保李重進爲同中書門下平章事克歸德軍
節度宋亳等州觀察處置等使兼侍衛親軍馬步軍
都指揮使以武信軍節度使兼殿前都指揮使檢校
太保駙馬都尉張永德爲檢校太傅充義成軍節度
使滑衛等州觀察處置等使兼殿前都指揮使以定
國節度使檢校太傅藥元福爲檢校太尉充保義軍
節度陝虢等州觀察處置等使以保大軍節度使檢
校太傅白重贊爲檢校太尉充河陽三城節度孟懷

等州觀察處置等使以保義軍節度使檢校太保韓通爲檢校太傅克彰信軍節度曹單等州觀察處置等使時帝以卽位之初覃慶於諸侯亦賞從征河東之勞也

二年十一月秦鳳等州詔應馬步軍營將士等各與恩澤其有歿於王事者自副兵馬使以上並與贈官仍賜賻贈物

三年正月己亥上於金祥殿賜陳州節度使向訓襲衣金帶銀器繒帛鞍馬餘各有差賞西征之功也

六月甲子以鳳翔節度使王景爲雄武軍節度使兼

西面緣邊都部署以宣徽南院使鎮安軍節度使向訓爲檢校太尉依前宣徽南院使充淮南節度使以彰信軍節度使韓通爲檢校太尉忠武軍節度使以賞秦鳳之功也

四年五月辛亥賜應淮南征行軍士金銀錢帛有差賞其勞也

五年五月辛亥以征淮南廻降德音云睽彼戎士咸遵武經或從我征行久服勤於甲冑或守茲城邑能安定於封圻宜舉彛章首膺懋賞應侍衛殿前及諸道馬步軍將士等各賜等第優給餘從宣命處分

是月帝以征淮南廻賜宰臣樞密侍衛宣徽使及翰林學士中書舍人內諸司使已下器幣鞍馬各有差賞扈從之勞也

册府元龜

李嗣京參閱

西極文翔鳳訂正

豫章黃國琦較釋

帝王部

一百二十九

封建

漢氏之興以同姓寡少復鑒嬴秦孤立之敗繇是立二等之爵以封功臣蓋異姓王肇於此矣東京以降施姑息之政遵權宜之制良有之也其於褒崇勳望申之異數咸無聞焉元魏之世多被殊號垂及唐室

著之班秩胙土典冊寵名斯紀同光之後勳臣競爽
或稱藩請命撫封傳世恭順傾嚮外禦宣力則必加
之異數尊其爵禮稽若前訓咸可述焉至若貞觀之
詔追用古道事雖中寢亦并敘云乃百執所封五等
之制盖為嘗典此不備書

漢高祖初為漢王二年十二月立韓太尉信為韓王
初信從漢王入漢中說漢王東鄉爭天下漢王還定
三秦乃許王信先拜為太尉將兵畧韓地項羽殺韓
王成聞漢遣信畧韓地乃令故籍游吳時令鄭昌為
韓王項籍在吳時距漢信略地定韓地十餘城漢王
昌為吳縣令

至河南信急擊韓王昌昌降漢乃令立信為韓王常
將韓兵

三年十月韓信定趙遣使報漢因請立張耳王趙以
撫其國漢王許之

四年二月立韓信為齊王初信已破齊使人言曰齊
邊楚權輕不為假王恐不能安齊漢王怒欲攻之張
良曰不如因而立之使自為守乃遣張良操印立之
七月立黥布為淮南王初項籍立布為九江王齊王
田榮叛項王徵兵布稱病不往項王由此怨布布愈
恐漢使隋何使九江項王使龍且攻破布軍布間行

與隋何俱歸漢故立為王布與漢擊楚垓下項籍死布遂剖符都六九江廬江

衡山豫章皆屬焉

五年正月下令曰楚地已定義帝亡後欲存卹楚眾以定其主齊王信習楚風俗更立為楚王王淮北都下邳魏相國建成侯彭越勤勞魏民卑下士卒嘗以少擊眾數破楚軍其以魏故地王之號曰梁王都定陶二月詔曰衡山王吳芮與子二人兄子一人從百粵之兵以佐諸侯誅暴秦有大功諸侯立以為王項王侵奪之地謂之番君其以長沙豫章象郡桂林南海立番君芮為長沙王又詔曰故粵王亡諸世奉粵

祀秦侵奪其地使其社稷不得血食諸侯伐秦亡諸身帥閩中兵以佐滅秦項羽廢而弗立今以為閩粵王王閩中地勿使失職

七月燕王臧荼反帝自將征之九月虜荼詔諸侯王視有功者立以為燕王荆王臣信等十人皆曰太尉長安侯盧縮功最多請立以為燕王

十一年五月詔曰粵人之俗好相攻擊前時秦徙中縣之民南方三郡中縣之民中國縣民也秦始皇略取強梁地以為桂林象郡南海郡故曰使與百粵雜處欲介其間會天下誅秦南海尉二郡它居南方長治之治亦侘南海尉之名姓趙長甚有治謂為之長帥而治理之也

文理中縣人以故不耗滅

耗損也

粵人相攻擊之俗益

止俱賴其力今立它為南粵王使陸賈即授璽綬

即就

地就其所居而立之

十二年二月詔曰南武侯織亦粵之世也立以為南

海王

高祖五年以象郡桂林南海長沙立吳芮為長沙王象郡桂林南海屬尉佗未降還虛奪以

封芮耳後佗降漢十一年更立佗為南越王自佗王三郡芮唯得長沙桂林零陵耳今復封織為南海王

復還奪佗一郡織得王之

惠帝三年舉高帝時粵功

追論其功

曰閩君搖功多其民

便附廼立搖為東海王都東甌世號曰東甌王

武帝建元六年閩粵擊南粵漢遣大行王恢擊閩粵

閩粵王弟餘善殺王郢以降帝口郢等首惡獨無諸

孫繇丑不與謀

繇邑號也

乃使中郎將立丑為粵繇王奉

閩粵祭祀餘善以殺逞威行國中民多屬心竊自立

為王繇王不能制帝聞之為餘善不足復興師曰餘

善首誅郢師得不勞因立餘善為東粵王與繇王並

處

後魏太武即位初進司徒長孫嵩爵為比平王司空

奚斤為宣城王藍田公長孫翰為平陽王其餘普增

爵位各有差

神麈三年十一月封壽光侯叔孫建為丹陽王

太延元年五月進宜都公穆壽為宜都王汝陰公長孫道生為上黨王宜成公奚斤為常農王廣陵公樓伏連為廣陵王

文成興安元年十一月進平南將軍宋子使周怛爵為樂陵王南部尚書安子侯麗為平原王

十二月建業公陵侯進爵東平王廣平公杜遺濮陽公閻若文並進爵為王

二年正月司空杜元寶進爵京兆王尚書左僕射東安公劉尼尚書西平公源賀並進爵為王

三月安豐公閻虎皮進爵為河間王

太安元年十月以遼西公嘗英為太宰進爵為王

二年九月河東公閻毗零陵公閻紇並進爵為王

十一月尚書西平王源賀改封隴西王

三年正月以漁陽公尉眷為太尉進爵為王

和平三年正月以車騎大將軍東郡公乙渾為大康

王

獻文天安元年二月以待中陸定國為東郡王

皇興二年四月以南郡公李惠為都督關右諸軍事

雍州刺史進爵為王

三年二月以上黨公慕容白曜為都督青齊東徐二

州諸軍事青州刺州進爵濟南王

十一月襄城公韓頽進爵爲王

孝文太和二年正月封昌黎王馮熙第二子始興爲
北平王

二年四月淮陽公尉元進爵爲王

九月封司徒趙公陳建爲魏郡王司空河南公苟頽
爲河東王侍中尚書太原公王獻爲中山王侍中尚
書隴東公張祐爲新平王

五年九月封昌黎王馮熙世子誕爲南平王誕眞帝
同歲幼侍書學仍蒙親待尚帝妹樂安長公主拜駙

馬都尉侍中征西大將軍南平王

唐高祖武德二年七月和州賊帥杜伏威遣使來降
授和州總管東南道行臺尚書令封楚王三年六月
徙封吳王

十月詔徐世勣父上柱國舒國公蓋宜封濟陰郡王
四年正月竇建德行臺尚書令胡大恩以大安
封定襄王

太宗貞觀十一年六月戊辰以司空長孫無忌爲越
州刺史改封趙國公左僕射房玄齡爲宇州刺史改
封梁國公故司空杜如晦贈密州刺史改封萊國公

特進李靖爲濮州刺史改封衛國公特進吏部尚書
高士廉爲申州刺史改封中國公趙郡王孝恭爲觀
州刺史改封河間郡王同州刺史尉遲敬德爲宣州
刺史改封鄂國公光祿大夫李世勣爲蘄州刺史改
封英國公左驍衛大將軍段志玄爲金州刺史改封
褒國公左領軍大將軍程知節爲普州刺史改封盧
國公兵部尚書侯君集爲陳州刺史改封陳國公任
城王道宗爲鄂州刺史改封江夏郡王太僕卿劉弘
基爲朗州刺史改封夔國公金紫光祿大夫張亮爲
隰州刺史改封鄖國公因下詔曰周武定業胙茅上

於子弟漢高受命誓帶礪於功臣豈止重親賢之地
崇其禮秩抑亦固盤石之基寄以藩翰魏晉已降事
不師古建侯之制有乖名實非所謂藩屏王室永固
無窮者也隋氏之季四海沸騰朕運屬殷憂戡剪多
難上憑明靈之祐下賴英賢之輔廓清寓縣嗣守寶
曆豈予一人獨能致此時迺旣共資其力世安而專
饗其利乃睠於斯甚所不取但今之刺史卽古之諸
侯雖立名不同而監統一也故申命有斟酌前代宣
條委其治之寄象賢存世及之典司空齊國公無忌
等或材稱人傑望表國章論道廟堂寄深舟楫用資

文武誠著艱難折衝闔外隱如敵國或志力忠烈寔
 為心膂或氣幹強果是曰爪牙策名運始功參締構
 義貫休戚效彰夷險嘉庸懿績簡于朕心宜委以藩
 鎮改賜土宇餘官食邑並如故卽令子孫世世承襲
 其後無忌等將之國情皆係戀不願行辭不獲免無
 忌子尚長樂公主乃因主陳請又繆出怨言以激帝
 曰臣披荆棘以事陛下今海內寧一不願遠離而棄
 牧外州復與遷徙何異因上表固讓曰臣等夙奉明
 詔授臣刺史子孫繼襲事等建侯承恩以來進退唯
 谷公私迫切益深危懼竊以無勞而貴自開逐禍之
 原仰累明時虛行變古之道形影相弔若履春冰宗
 賊憂危如寘湯火臣無稽等誠惶恐頓首頓首
 罪成罪臣聞質文迭變皇王之迹有殊今古相沿致
 理之方乃革仰維三代習俗靡嘗爰制五等隨時作
 教蓋由力不能制因而利之禮樂節文多非已出逮
 夫兩漢用矯前違置守頒條彌除曩弊無益之文覃

及四方不易之理有逾千載今為臣等復此奄荒欲
 其優隆錫之茅社施于子孫永貽宗嗣斯乃大鈞播
 物秋毫益施其生小人踰分後葉必嬰其禍何者違
 時易務曲樹私恩謀及庶僚義非僉允方招史冊之
 誦有紊聖代之綱此其不可一也又臣智效罕施器
 識庸陋或情緣后戚遂陟台階或願想披荆便蒙夜
 拜直當今日猶愧非才重裂山河逾彰濫賞此其不
 可二也又且孩童嗣職義乖師儉之方任以褰帷寧
 無傷錦之弊上干天憲竊與典既有嘗科下擾庶民必
 致餘殃於後一掛刑網自取誅夷陛下深仁務延其
 嗣翻令勦絕誠有可哀此其不可三也當今聖歷休
 明求賢分政古稱良守寄在其理此道之行為日滋
 久緣臣等忽有之改張封植兒曹失於求瘼百姓不
 幸將焉用之此其不可四也在茲一舉為損實多曉
 夕深思憂貫心髓所以披丹上訴指事明心不敢浮
 辭同於矯飾伏願天澤諒其愚款特停渙汗之旨賜
 其性命之恩太宗謂之曰割地以封功臣古今之通
 義也意欲公之枝葉翼朕子孫長為藩翰傳之永久
 清在此耳而公等薄山河之誓發言怨
 望朕亦安可強公以土宇耶於是遂止

中宗神龍元年正月封右羽林大將軍李多祚為遼陽郡王食實封八百戶以誅張易之兄弟功也

五月封侍中齊國公敬暉為平陽郡王桓彥範為扶陽郡王袁恕已為南陽郡王中書令漢陽公張柬之為漢陽郡王中書令博陵郡公崔玄暉為博陵郡王並加特進仍令罷知政事仍聽朝朔望

玄宗天寶九載十月封安祿山為東平郡王制曰寄重者位崇勲高者禮厚欽若古訓抑惟舊章開府儀同三司兼右羽林軍大將軍員外置同正員御史大夫范陽大都督府長史柳城郡太守持節克遼陽節

度經略度支營田陸運押兩蕃渤海墨水等四府節度處置及平盧軍河北海運并管內採訪等事上柱國柳城郡開國公安祿山性合韜鈴氣稟雄武聲威振於絕漠捍禦比於長城戰必尅平智能料敵所以擢升臺憲仍伏旌麾旣表勤王之誠屢申殄寇之畧頃者契丹負德潛有禍心乃能運彼深謀累梟渠帥風塵肅靜斥候無虞不有殊恩孰彰茂績疆場式遏且薄衛霍之功土宇斯開宜踐韓彭之秩可封東平郡王仍更賜實封二百戶通前五百戶餘如故

十二載八月封隴右節度使哥舒翰為西平郡王

肅宗乾元二年七月封朔方都知兵馬使節度副使
僕固懷恩爲太寧郡王

元年建辰月辛未詔曰命將之選當仁實難非夫文
可經邦不能安人和衆武可禁暴罔以尅敵成功允
藉宏才爰申錫命司徒中書令靈州大都督府長史
單于鎮北副大都護持節克朔方節度關內支度營
田鹽池押諸蕃部落副大使知節度事六城水運使
兼邠寧鄜坊等道節度副大使上柱國代國公子儀
河嶽間氣巖廊重寶器量深識寬而有謀術應通方
用而無滯自經難阻實擁旌旄遂能尅復二京折衝

千里厥戎將殄時乃之功久勤啓沃載竭忠讜人之
型也天實資予今殄寇未寧興師頗廣鎮守經制已
有區分而籌畫指麾必資專制將軍辭第無以家爲
丞相憂邊思平國難固以討謀之用宜申總統之威
其將戡定外虞澄清列郡光膺藩屏之寄式崇社稷
之勲對揚休命以永終譽可封邠陽郡王知朔方河
中北庭潞儀澤沁等州節度行營兼興平定國等兵
馬副元帥仍克本管內觀察處置使餘如故

代宗寶應元年五月丙戌太尉兼中書令鄭國公李
光弼進封臨淮郡王

八月劍南狂賊徐知道為麾下將李忠勇所殺劍南州縣盡平封忠勇為臨晉郡王又封平盧淄青節度使侯希逸為淮陽郡王

二年閏正月戊申封成德軍節度使李寶臣為清河郡王是年又封幽州節度使李懷仙為武威郡王魏博節度使田承嗣為鴈門郡王

六月封陳鄭澤潞節度使李抱王為武威郡王廣德元年封尚書右僕射郭英乂為定襄郡王永泰元年二月封神策軍都虞侯劉希暹為交河郡王大將李守泰為同谷郡王孫猷心為宣城郡王楊

通達為高平郡王段子英為遂寧郡王

八月涇原節度使兼御史大夫馬璘封扶風郡王

十月封朔方大將孫守亮九人為異姓王又封李國臣等十三人為異姓王是月進封渭北節度使李光

進為武威郡王

大曆二年二月封華州牙將姚懷為感義郡王李延俊為永化郡王以斬周智光之功也

六月封荆南節度江陵尹衛伯玉為城陽郡王

五年四月封幽州節度使朱希家為高密郡王

九年三月封幽州節度使朱泚為淮寧郡王十二年徙封遂

寄郡

九月封平盧節度都知兵馬使試殿中監王廷俊為陽城郡王都虞侯試殿中監李令德為狄道郡王步軍使試太嘗卿劉神藻為順正郡王都押衙試太嘗卿許皎為隣山郡王並賜實封五千戶

十年二月封平盧淄青節度使李正己為饒陽郡王德宗嗣位初封四鎮北庭行軍涇原鄭穎節度使段秀實為張掖郡王

建中元年六月封涇州裨將試殿中監劉海賓為樂平郡王賞殺劉文喜也

二年五月封淮寧節度使李希烈為南平郡王

三年四月封幽州節度使朱滔為通義郡王

九月封河陽節度使李元為開封郡王

四年冬封朱忠亮為東陽郡王忠亮事薛嵩為將鎮普潤朱泚之亂以塵

下奔奉天德宗加之故封

白孝德累有功為安西北庭節度鄜延邠寧節度封

昌化郡王

興元元年二月封成德節度兼幽州盧龍兩道節度

王武俊為琅琊郡王是歲又封武俊子德瑗觀察使士貞為清河郡王貞元初封士

貞弟冀州刺史士清為北海郡王

八月癸卯加神策軍京畿渭南渭北鄭坊節度及兵馬副元帥司徒兼中書令合川郡王

臣欽若等曰本傳及實錄不載

封合川郡王食實封一千五百戶李晟兼鳳翔尹充鳳

翔隴右節度度支營田觀察使仍充管内諸軍及涇

原四鎮北庭行營兵馬副元帥改封西平郡王加河

東保寧軍節度觀察使太原尹北都留守簡較司徒

平章事北平郡王馬燧奉誠軍及晉慈隰節度并管

內諸軍行營兵馬副元帥以靈鹽豐夏節度使邠寧

振武奉天永平等軍兵馬副元帥侍中兼靈州大都

督樓煩郡王食實封一千八百戶渾瑊為河中尹河

中絳州節度觀察等使仍充河中同絳陝虢節度及

管内諸軍行營兵馬副元帥改封咸寧郡王

十月李希烈將李澄以滑州降以為汴滑節度封武

威郡王是年又封禁軍將軍李惟簡為武安郡王是

年又封神策京畿渭南商州節度尚可孤為馮翊郡

王是歲又封靈鹽豐夏節度杜希全為餘姚郡王

貞元元年封魏博節度田緒為嘗山郡王

六年四月宣武軍節度使檢校司空平章事懷德郡

王劉玄佐徙封彭城郡王賜實封八百戶

十一年八月改封魏博田緒為廡門郡王

吐蕃功也

十七年封劍南西川節度使韋臯為南康郡王賞破

襄郡王

憲宗元和二年正月封振武軍節度使閻巨源為定

六年封招義節度使盧從史為范陽郡王

八月封劍南西川節度高崇文為南平郡王

十三年封涇原行營節度郝毗為保定郡王

十四年二月封義成軍節度劉悟為彭城郡王

敬宗寶曆二年封幽州節度朱克融為吳興郡王是

年討幽州李載義為武威郡王
文宗太和三年十一月封武寧節度王智興為鴈門郡王

武宗會昌中封幽州節度張仲武為蘭陵郡王

僖宗中和元年封西川節度陳敬瑄為潁川郡王是

年封河中節度王重榮為琅琊郡王

光啓元年封徐州節度時溥為鉅鹿郡王

昭宗乾寧四年三月制封鎮國軍節度韓建為昌黎

郡王光化元年改封潁川郡王是年九月封鎮海東

節度使錢鏐為吳王

光化元年九月制封魏博節度使羅弘信為臨清王

二年七月封武貞節度使雷滿為馮翊郡王
荆南節度忠萬等州觀察成汭封上谷郡王

忠義軍節度趙凝封南平王後封楚王

天祐元年封鎮州王處直為太原王

後唐莊宗同光元年十一月制忠義太保等軍節度

延鄜管内觀察處置等使檢校太師兼中書令北平

王高萬興復封北平王

萬興在梁朝已封北平至是復以舊爵授之

是年

湖南節度馬殷首脩職貢復封楚王

梁貞明中已封楚上明故云復

封

二年二月辛巳以檢校太師守尚書令兼河南尹判

六軍諸衛事魏王張全義為守太尉兼中書令孟州

刺史充河陽三城節度孟懷等州觀察處置等使河

南尹封齊王是年封荆南節度高季興為南平王

三年八月正衙命史册兩浙吳越王錢鏐為吳越國

王癸亥太嘗禮院奏吳越王錢鏐行册禮宜取八月

二十七日丁亥吉奉勅其印宜以吳越國王之印為

文仍令所司以金鑄造

明宗天成二年四月癸丑制曰朕聞襲弓裘之美惟

孝承家秉旄鉞之權惟忠報國其有顯居世祿傑出

時材疾風端勁草之心積雪驗貞松之節恐毀我室

非闕於墻宜遵紹續之文俾授統臨之寄爰於剛日
特舉彝章威武軍節度觀察留後起復雲麾將軍檢
校太傅使持節舒州諸軍事守舒州刺史兼御史大
夫柱國琅琊縣開國伯食邑七百戶王延鈞拱北華
星圖南巨翼垂金精於玄象刷王宇於雄風而自皂
蓋分憂清源共理五馬之聲光首出八龍之價譽相
高旣縮珪符俄從金革在原無惠咸推晉后之賢當
璧有徵大叶楚人之望而又上欽天眷傍沮物情守
祖考之貽謀却藩宣之承制心傾皎日義惡浮雲建
溪之誓帶如河閩嶺之礪山齊嶽父風宛在臣節彌

堅是命高建牙璋洞開王帳錫以油幢瑞節廣其涑
水紅蓮寵冠阿衡貴同緹騎尊以師而表敬實其戶
而增封併示貞榮仍加懿號於戲象賢務德克揚嗣
子之名進律推恩當顯使臣之禮勉膺殊渥永保令
圖可依前授起復雲麾將軍右金吾衛大將軍外置
司正員檢校太師守中書令福州大都督府長史克
武威軍節度福建管內觀察處置兼三司發運節度
封琅琊王三年命左散騎常侍陸崇持節冊爲閩王
六月以天策上將軍湖南節度使楚王馬殷封楚國
王七月中書奏馬殷封楚國王禮文不載國王之制

請約三公之儀使行冊奉制宜依
閔帝應順元年正月壬辰制以荆南節度使檢校太
尉兼中書令江陵尹渤海郡侯高從誨可封南平王
武安武平等軍節度觀察等使檢校大尉兼中書令
行潭州大都督府長史扶風郡侯馬希範可封楚王
末帝清泰元年制以幽州盧龍軍節度押奚契丹經
略盧龍軍等使兼北面行營招討使檢校太師中書
令行幽州大都督府長史天水郡公趙德鈞封北平
王平盧軍節度押新羅渤海兩蕃等使檢校太師中
書令樂安郡公房知溫封東平王

晉高祖天福二年五月制天雄節度秦國公范延光
可封臨清王又制鳳翔節度使西平王李從暉封岐
王是月封平盧節度一土建為臨淄王二年封東平王
五年入覲進封韓王

周太祖顯德元年正月以山南東道節度襄鈞房復
觀察等使檢校太師守太傅中書令南陽王安審琦
封陳王以天平軍節度鄆齊棣觀察等使檢校太師
守太保中書令淮陽王符彥卿克大名府天雄軍節
度使進封魏王以荆南節度荆歸峽觀察等使檢校
太師兼中書令江陵尹渤海郡王高保融封南平王

以定南難節度夏綏銀宥觀察等使檢校太師中書
令隴西郡王李彝殷封西平王

冊府元龜

淮南李嗣京叅閱

西極文翔鳳訂正

帝王部

一百三十

延賞

虞書曰賞延於世春秋傳曰善善及子孫斯道德之
政也三代而上靡得以記漢氏之後乃或錄元功之
胄褒宗臣之裔賓禮賢者獎勸能吏旌揚忠烈甄敘
舊故賞勤職之効采死政之孤繇是加其爵秩申之

冊府元龜 延賞 卷之百三十一
錫予俾奉其嗣世而高其門閥使求纓之不墜宗奠
之有寄焉其或因旅愷之慶乘肆眚之澤大敘前世
之勲籍並分三公之封邑乃至漏澤流根上延於祖
考脂田析壤俯達於閭闈渥惠所覃息系咸及斯固
需恩紀於臣下集光寵於私門所以勸有位之盡心
著爲邦之令典者也

漢高祖八年九月封紀成子通爲襄平侯初城以將
軍從擊破秦入漢定三秦戰好時死事子侯

十年九月封周苛子成爲高景侯初苛以內史從擊
破秦爲御史大夫入漢圍取諸侯守滎陽功比辟陽

侯罵項籍死事子侯

十二年二月高梁侯酈齊父食其以客從破秦還定
諸侯常使使約和諸侯說齊王死事子侯

孝景中元年四月封故御史大夫周苛周昌孫子爲
列侯

二年九月封故楚趙傅相內史蒯死事者四人子皆
爲列侯初趙王遂與吳楚合謀起兵其相建德

史失其姓

內史王悍諫不聽遂燒殺之遂自殺帝憐趙相內史
守正歿封建德子橫遂侯悍子棄之新市侯又楚相
張尙太傅趙夷吾諫其王戊勿反不聽皆殺之故封

夷吾子固為高陵侯尚之子當居為山陽侯

武帝即位求賢良舉馮唐唐時年九十餘不能為官

廼以子遂為郎

元朔五年拜衛青為大將軍帝曰青躬率戎士師大

捷獲匈奴王其封青子伉為宜春侯不疑為陰安侯

子登為陰發侯

元符中復詔御史以鄼二千四百戶封蕭何曾孫慶

為鄼侯布告天下令明知朕報蕭相國德厚也

元鼎五年三月封故較尉韓千秋摻樂子二人為列

侯初南粵王興與毋摻太后欲內屬相呂嘉有畔心

漢遣千秋與樂將二千人往嘉擊滅之於是天子曰

韓千秋雖無成功亦軍鋒之冠封其子延年為成安

侯摻樂其姊為王太后首領願屬漢封其子廣德為

葉古葉侯

汲黯為淮陽守卒後武帝以黯故官其弟仁至九卿

子偃至諸侯相

宣帝本始元年正月詔曰故丞相安平侯敞等居位

守職與大將軍光車騎將軍安世建議定策以安宗

廟功賞未加而薨其益封敞嗣子忠敞楊敞也是年復下

詔曰宣成侯光霍光宿衛忠正勤勞國家善善及後世

善善者謂褒寵善人也

其封光兄弟中郎將雲為寇陽侯又以

車騎將軍光祿勳張安世子千秋延壽彭祖皆中郎

將侍中

地節二年大將軍大司馬霍光病篤帝自臨問即日

拜光子禹為右將軍

四年二月封故鄼侯蕭何曾孫建世為侯蘇武為右

曹典屬國以其前發匈奴時胡婦產一子通國為郎

又以武弟子為右曹

元康三年三月詔曰朕微眇時故掖庭令張賀輔導

朕躬修文學經術恩惠卓異厥功茂焉詩不云乎無

德不報封賀所子弟子侍中中郎將彭祖為陽都侯

所子者言養弟子以為子

平帝元始二年詔曰漢興以來股肱在位身行儉約

輕財重義未有若公孫弘者也其賜弘後子孫之次

見為適者爵關內侯食邑三百戶

四年詔書追錄忠臣封王嘉子崇為新甫侯

後漢光武以鄧禹功高封弟寬為明親侯

李通南陽宛城人也自光武起兵以士君子之學且

言識文事及光武即位有司奏請封諸皇子帝感通

首創大謀即日封通少子雄為召陵侯

卓茂初為密令及更始政亂以年老乞骸骨歸光武
卽位下詔曰前密令卓茂身自修執節淳固誠能
為人所不能為以茂長子茂為大中大夫次子崇為
中郎給事黃門

王閔王莽時為牧守莽敗乃去官光武下詔曰武王
克殷表商容之間閔修善謹勅兵起吏民獨不其
頭首今以閔子補吏至墨綬

建武中錄舊德臣以孫寶孫儁為諸長

伉音抗諸琅
琊之縣也

宣秉為大司徒司直所得祿俸輒以收養親族其孤

弱者分與田地自無擔石之儲

齊人名小嬰為擔石
江淮人謂一石為擔

卒於官帝愍惜之除子彪為郎

來歙為中郎將討公孫述為刺客所殺帝賜策書曰
中郎將來歙攻戰連年平定羌隴憂國忘家忠孝彰
著遭命遇害嗚呼哀哉子褒嗣帝嘉歙忠節復封歙
弟田為宜西侯

杜林為大司空薨光武親自臨喪既葬除子喬為郎
詔曰公侯子孫必復其始賢者之後宜宰城邑以喬
為冊水長

馮異與諸將攻落門未拔

落門聚石
在冀縣

病發薨于軍謚

曰節侯長子彰嗣明年帝思異功復封彰弟沂為祈

鄉侯建武十三年更封彰東緡侯食三縣

吳漢兄尉為將軍從征戰歿封尉子彤為安陽侯帝

以漢功大復封弟翁褒親侯吳氏侯者凡五國

岑彭征蜀為刺客所殺子遵嗣帝思彭功封遵弟淮

為穀陽侯

郭涼既平盧芳弟擢涼為中郎宿衛左右

明帝以鄧禹先帝元功拜為太傅居歲餘寢疾帝數

自臨問以子男二人為郎及薨帝分禹封為三國長

子震為高密侯襲為昌安侯珍為夷安侯

趙孝為衛尉弟禮為御史中丞帝嘉其兄弟篤行後

卒孝無子拜禮兩子為郎

司空袁隗薨子屯嗣帝追思隗忠擢屯為步兵校尉

徙封西陽侯

宋均為河內太守政化大行以疾上書乞免詔除子

條為太子舍人

章帝即位追賜朱勃子穀二千斛東觀記曰帝下詔

人故雲陽令朱勃建武中以依波將軍爵土不傳伏

闕陳狀不顧罪戾懷旌善之志有烈士之風詩云無

言不讎無德不報其以縣見穀二千斛賜勃子若孫勿令遠請闕

趙熹為太傅錄尚書事帝擢諸子為郎吏者七人長

子代給事黃門熹自明帝時內典宿衛外幹

宰職正身立朝未嘗懈惰

傅育為武威太守護羌校尉擊叛羌戰死帝下詔追褒美之封其子毅為明進侯七百戶

和帝時魯恭為光祿勳選舉清平京師貴戚莫能撓其正後代呂蓋為司徒及從巡狩南陽除子撫為中

郎賜駙馬從駕

駙副也非正所乘皆為副說文曰駙馬副馬也

安帝元初中鮮卑寇漁陽太守張顯率兵馬掾嚴授主簿衛福功曹徐咸赴之援福等並為虜所殺詔書褒歎各除子一人為郎中

鄧弘元初二年卒詔大鴻臚持節即弘殯封子廣德

為西平侯後以帝師之重

弘少治歐陽尚書授帝禁中

分西平之

都鄉封廣德弟甫德為都鄉侯又封弘兄黃門侍郎

京子珍為陽安侯邑三千五百戶

建光元年二月大赦天下以公卿校尉尚書子弟一

人為郎舍人

順帝即位以鄭安世子亮為郎初安帝廢太子為濟陰王安世與太嘗桓焉大僕來歷等共正議諫爭及帝立安世已卒追賜錢帛除亮為郎

張綱漢安中為廣陵守卒詔曰綱大臣之苗剖符統務正身道下班宣德信降集劇賊張嬰等萬人息干戈之役濟蒸庶之困未升顯爵不幸且卒嬰等縶杖

若喪考妣朕甚愍焉拜綱子續爲郎中賜錢百萬
冲帝永嘉元年封武威太守趙冲子愷義陽亭侯冲
順帝時追叛羌戰歿至是故侯

桓帝時羊續父儒爲太常續以忠臣子孫拜郎中
段熲爲中郎將擊琅琊賊東郭寶公孫舉等大破斬
之獲首萬餘級除一子爲郎中後以討先零東羌功
詔以家一人爲郎中

胡爽爲南郡太守李肅主簿時武陵蠻寇江陵肅奔
走爽諫止肅肅遂殺爽而走帝聞之徵肅棄市拜爽
家一人爲郎

靈帝時陸康爲議郎會廬江賊黃穰等與江夏蠻連
結十餘萬人攻沒四縣拜康廬江太守康申明賞罰
擊破穰等餘黨悉降帝嘉其功拜康孫尙爲郎中

張酺曾孫濟好儒學初揚賜薦濟明習典訓爲侍講
至司空病罷及卒帝以舊恩贈車騎將軍關內侯印
綬追濟侍講有勞封子根爲蔡陽鄉侯

臧洪父旻爲楊州刺史擊破妖賊許昭遷爲使匈奴
中郎將洪年十五以父功拜童子郎

獻帝初袁術屯兵壽春遣其將孫策攻廬江太守陸
康圍城數重受敵二年城陷月餘發病卒年七十宗

族百餘遭離饑危死者將半朝廷愍其守節拜子為郎中

桓典為羽林郎獻帝即位三公奏典前與大將軍何進謀誅闖官功雖不遂忠義炳著詔拜家一人為郎元尚為兗州刺史袁術將僭號欲以尚為太尉尚拒之為術所害帝嘉尚忠烈拜其子瑋為郎中

孫瑞為大司農為三老後為亂兵所害獻帝都許追論瑞功封子明澹津侯

魏文帝踐阼以程昱復為衛尉昱自太祖建國為衛尉與中尉邢貞爭威

儀進封安鄉侯增邑三百戶并前八百戶分封少子

延及孫曉列侯

董昭自太祖受魏公魏王之號皆昭所創及文帝踐阼拜大鴻臚進封右鄉侯二年分邑百戶賜昭弟訪爵關內侯又分邑百戶賜一子爵關內侯黃初二年分三公戶邑封弟子各一人為列侯

賈詡自文帝為五官將勸帝朝夕孜孜不違子道帝深自砥礪及即位以詡為太尉進爵壽鄉侯增邑三百并前八百戶又分邑二百戶封少子訪為列侯以長子穆為駙馬都尉

荀攸長子緝有攸風早沒次子適嗣無子絕黃初中

紹封攸孫彪為陵樹亭侯邑三百戶後轉封丘陽亭侯正始中追謚攸曰敬侯

黃初四年涼州刺史張既薨詔曰昔荀桓子立勳翟士晉侯賞以千室之邑馮異輸力漢朝光武封其二子故涼州刺史張既能容民畜衆使群羗歸土可謂國之良臣不幸薨隕朕甚愍之其賜少子翁歸爵關內侯

華歆薨子表嗣初文帝分歆戶邑封歆弟緝列侯鍾繇薨子毓嗣初文帝分毓戶邑封繇弟演及子邵孫豫列侯

文聘自太祖時為江夏太守使典北兵及帝踐阼以禦賊有功遷後將軍封新野侯分聘戶邑封聘子岱為列侯又賜聘從子厚爵關內侯

張遼與李典嘗破孫權後遼薨子虎嗣帝追念遼典在合肥之功詔曰合肥之役遼典以步卒八百破賊十萬自古用兵未之有也使賊至今奪氣可謂國之爪牙矣其分遼典邑各百戶賜一子爵關內侯虎為偏將軍

明帝青龍四年司空陳群薨謚曰靖侯子泰嗣帝追思群功德分群戶邑封一子列侯

張邵薨子雄嗣邵前後征伐有功帝分邵戶封邵四子列侯賜少子爵關內侯

齊王即位孫資劉訪掌機密帝以訪資決定大謀增邑三百訪并前千二百資千戶封愛子一人亭侯次子騎都尉餘子皆郎中

王昶嘉平中為征南大將軍時文欽母丘儉作亂引兵拒儉欽有功封二子亭侯關內侯

尚貴鄉公甘露二年八月詔曰昔燕刺王謀反韓誼等諫而死漢朝顯登其子諸葛誕創造凶亂主簿宣隆部曲督秦絜秉節守義臨事固爭為誕所殺所謂

無比干之親而受其戮者其以隆絜子為騎都尉加以賜贈光示遠近以殊忠義

三年大將軍錄尚書事司馬昭奏錄先世名臣元功大勲之子孫隨才敘用

陳泰前後以功增邑二千六百戶賜子弟一人亭侯

二人關內侯

陳雷王即位封征南將軍督荊州諸軍事王基子二人亭侯關內侯

咸熙二年二月庚戌以虎賁張修昔於成都馳馬三請營言鍾會反逆以至沒身賜修弟倚爵關內侯

晉杜預為征南大將軍既平吳振旅凱入以功封子
耽為亭侯千戶

索綝為衛將軍領太尉時劉曜侵逼王城以綝為都
督征南大將軍持節討之破曜呼日逐王呼延莫以
功賜子弟二人鄉亭侯

明帝征王敦以諸葛攸為侍中加奉車都尉討王含
有功進封建安伯以先爵賜次子謙為關內侯

穆帝升平中改封大都督臨賀郡公桓溫為南郡公
降臨賀為縣公以封其次子濟

毛穆之為桓溫參軍從溫平蜀以功賜次子都鄉侯

哀帝興寧中冠軍長史沈勁守洛陽為慕容恪攻圍
神氣自若遂遇害朝廷聞而嘉之贈東陽太守子赤

黔為大長秋

後魏明帝以許謙自太祖時有功其子洛陽從征慕容
容寶為冠軍司馬後為祁令帝追錄謙功以洛陽為

馬門太守

太武以宿石父沓干自明元時從討蠕蠕戰歿悼惜
之詔求沓干子時石年甫十一引見以幼聽歸年十
三襲爵為中散

谷渾為儀曹尚書在官廉直為太武所器重詔以渾

子孫十五已上悉補中書學生

屈拔垣之孫道賜之子拔少好陰陽學太武追思其

父祖年十四以為南部大夫

文成初以李靈學優選授經及踐阼為洛州刺史率

子恢以師傅之子拜員外散騎常侍安西將軍長安

鎮副將進爵為侯

鉅鹿公源賀長子延性謹厚好學以功臣子拜侍御

中散賜爵武城子西治都將

陸侯為外都大官帝踐阼以子麗有策立之勳拜侯

征西大將軍進爵東平王

孝文太和十四年尚書李冲奏劉珣河右碩儒今子

孫沉屈未有錄聞賢者子孫宜蒙顯異於是除其一

子為郢州雲陽令

陸獻簡王麗之子為北部尚書太和十六年隆五等

之爵以麗勳著前朝封獻鉅鹿郡開國公食邑三百

戶

宣武以張彞先朝勳舊不幸疢廢特除其子始均長

兼左民郎中

高顯族道悅之長子也道悅孝文時為太子詢中庶

子詢以道悅數規諫殺之宣武追錄忠槩拜顯族給

事中

源懷爲車騎大將軍隴西王賀之子景明二年上表
曰昔高祖昇遐南安在位出拜東廟爲賊臣宗愛所
弑時高祖避難龍潛苑中宗愛異圖神位未定臣亡
父先臣賀與長孫渴侯陸麗等奉迎高宗纂徽寶命
麗以扶負聖躬親所見識蒙授撫軍大將軍司徒公
平原王興安二年追論定策之勲進先臣爵西平王
皇興季年顯祖將傳大位先臣時都督諸將屯於武
川被徵詣京特見顧問先臣固執不可顯祖久乃許
之遂命先臣持節授皇帝璽綬於高祖至太和十六

年麗息敷狀私書稱其亡父與先臣拔立高宗朝廷
錄封敷鉅鹿郡開國公臣時丁艱草土不容及例至
十二年除臣雍州刺史臨發奉辭而奏先帝申先臣
舊勲時敕旨但赴所臨尋當別判至二十二年車駕
幸雍臣復陳聞時蒙敕旨征還當授自宮車晏駕遂
爾不申竊惟先臣遠則拔立高宗寶曆不墜近則陳
諫顯祖神器有歸如斯之勲超世之事麗以父功而
獲山河之賞臣有家勲不霑茅社之錫得否相懸請
垂裁處詔曰宿老元丕云如所訴訪之史官頗亦言
此可依此授馮翊開國公邑百戶

孝明正光中高諒為驍騎將軍徐燝行臺屬元法僧
反叛逼諒同之諒不許為法僧所害朝廷痛惜之下
詔曰諒臨危授命誠節可重復贈使持節平北將軍
幽州刺史贈帛二百疋優一子出身謚曰忠侯
明亮為陽平汲郡二太守有惠政孝醫二年詔追前
功重贈平東將軍濟州刺史拜其子逸遠奉朝請
崑光為車騎大將軍儀同三司領著作光年耆老雖
疾病稍增而強不已嘗在著作疾篤不歸孝親臨
少疾詔斷賓客中使相望為止聲樂罷諸遊眺拜長
子勵為齊州刺史

孝莊以原文宗學涉機警少有名譽永安中以父功
賜爵臨穎縣伯

辛敦字元禮太山平陽人梁州刺史禮弟子也性尚
閑素學涉書史以父靈引為王事除給事中

楊侃為北中郎將以河橋之功除其長子師為秘書

郎

肅廢帝以符寶郎王神貴子彥鴻為奉朝請房景先
為太學博士作五經疑問百餘篇神貴答之名為辨
疑奏上之帝親自執卷與神貴往復嘉其用心特除
彥鴻為奉朝請

帶方侯羅伊利卒子何奴亦忠實寡言有志度以勲
臣之子除侍御中散襲爵

爾朱文殊榮之子也帝以榮有破葛賊之勲進文殊
爵爲王增邑千戶超授散騎嘗侍撫軍將軍

西魏文帝以于義太師謹之子少矜嚴有操尚篤志
好學以父功賜爵平昌縣伯

賀若誼字道機父統爲右衛將軍誼性剛果有幹略
以功臣子賜爵容城縣男

恭帝元年以車騎大將軍劉雄從于謹平江陵進驃
騎大將軍開府儀同三司賜奴婢一百口別封一子

沂源縣伯又以從平并州拜上大將軍進爵趙郡公

邑二千戶舊封回授一子

後周尉遲運少強濟志在立功魏大統十六年以父

勲封安喜縣侯

豆盧勲聰悟有器局少授業國子學畧涉文藝文帝

以勲勲臣子封義安縣侯

李穆爲都督河橋之戰太祖馬中流矢墜穆以馬授

文帝遂得俱免擢授武衛將軍賜穆子惇安樂郡公

姊一人爲郡君自餘姊妹並爲縣君兄弟子姪及總

麻以上親并舅氏皆霑厚賜其見褒崇如此

尉遲端兄運為驃騎大將軍從楊志攻齊之并州以功別封端保城縣侯邑一千戶

閔帝時獨孤信進位柱國大將軍錄前後功增封聽

廻授諸子於是第二子善封魏寧縣公第三子穆必

安縣侯第四子藏義寧縣侯邑各一千戶第五子順

武城縣伯第六子隋建忠伯邑各五百戶

明帝武成初驃騎大將軍高琳從賀蘭祥征吐谷渾

以勲別封一子許昌縣公邑一千戶

宇文盛為驃騎大將軍從賀蘭祥平洮陽共和二城

封一子甘棠縣公

武帝保定三年二月詔魏大統九年以前都督以上

身亡而子孫未齒敘者節級授官

建德六年伐齊平鄴詔曰自晉州大陳至於平鄴身

殞戰傷者其子即授父本官

帝孝寬為徐州總管詔以平淮南之功別封一子滑

國公

韋壽為京兆尹以父鄭國公孝寬軍功賜爵永安縣

侯邑八百戶

魏文思左僕射寬之子年十一拜車騎大將軍儀同

三司散騎嘗侍尋以父功封新豐縣子邑五百戶

宇文愷字安樂杞國公忻之弟也以功臣子年三歲賜爵雙泉伯七歲進封安平郡公邑二千戶

權武襲慶之子也父為開府以力戰歿武以忠臣起家拜開府襲爵齊郡公邑千二百戶

隋文帝以李穆為并州總管帝以穆勞効同破鄴第一勲加三轉聽分授其二子榮才及兄賢子孝軌榮

及才並儀同大將軍孝軌進開府儀同大將軍又別封子雄為密國公邑三千戶

開皇十七年詔曰周曆告終群凶作亂釁起藩服毒被生人朕受命上玄廓清區宇靈聖垂祐文武同心

申明公穆鄖哀公孝寬廣平王雄蔣國公睿楚國公

勳齊國公穎越國公素魯國公慶則新寧公長又宜

陽公代積趙國公羅雲隴西公詢廣業公景真昌公

振沛國公譯項城公子相鉅鹿公子幹等登庸納揆

之時草昧經綸之日丹誠大節心奉帝圖茂績殊功

力宣王府宜弘其門緒與國同休其世子世孫未經

州任者宜量才并用庶享榮位世祿無窮

楊素為內史令以平江南賊功拜素子玄獎為儀同

又以討江南李稜等賊帝以素久勞於外詔令馳傳

入朝加子玄感官為上開府後為僕射又以破突厥

功進子玄感位爲柱國玄縱爲淮南郡公又以破達頭可汗加子玄感位大將軍玄獎玄縱積善上儀同又以獻皇后山陵制度多出於素上善之別封一子義康公郡邑萬戶子子孫承襲不絕又以討平漢王諒功拜其子萬石民行姪玄挺皆儀同三司

韋協字欽人廣州總管洸之子其父在廣州有功帝令協齋詔書勞問未至而父卒上以其父身死王事拜協柱國

趙元淑父世模初事高寶寧後以衆歸國授上開府寓居京兆之雲陽文帝踐阼嘗典宿衛後從晉王伐

陳先鋒遇賊力戰而死朝廷以其身歿王事以元淑襲父本官賜物二千段

來護兒爲上開府破高智惠盛道延進位柱國仍留長子楷爲千牛備身

王猛爲將經畧嶺表仍討平山越馳驛奏聞文帝以其長子績爲開府儀同三司猛子尋卒於廣州帝聞而痛之命其子善襲仍授普州刺史

楊義臣父崇開皇初封泰興公擊突厥力戰而死贈大將軍豫州刺史以義臣襲崇官爵義臣尚幼養於宮中年末弱寇奉詔宿衛千牛者數年賞賜甚厚

煬帝大業初皇甫誕爲漢王諒并州司馬諒反誕抗節而死帝封弘義公子無逸嗣大業令行舊爵例除以無逸誠義之後賜爵平興侯

麥孟才鐵杖之子字智稜果烈有父風帝以孟才節將子恩賜殊厚拜武賁郎

馮慈明爲尚書兵曹郎時李密逼東都慈明抗節爲其所害梁通郡守楊江上狀帝歎息之贈銀青光祿大夫拜其二子惇惇俱爲尚書承務郎

唐高祖武德二年四月伊州總管張善相爲王世充兵所攻陷賊執善相送於世充善相辭色不撓世充

怒令斬之善相罵世充極口而死高祖聞而歎曰吾負善相善相不負吾也封其子爲襄城郡公

張孝珉爲驃騎將軍經略王世充爲賊所殺高祖聞而傷之拜其弟度脫爲大將軍封郡公賜帛二百疋高蒲政爲朔州總管右虞侯杜士遠所殺高祖以其子女積爲上柱國榮國公食邑三千戶

張長遜爲五原太守會處羅可汗解兵去高祖大悅封其父暉爲遂安郡公

太宗貞觀五年九月癸亥詔曰惟王建國厚禮被於元勳惟帝念功茂賞隆於延世是以親賢作屏著在

周經支庶畢侯義存漢典開府儀同三司齊國公無
忌尚書左僕射邢國公玄齡故尚書右僕射蔡國公
如晦靈州都督吳國公尉遲敬德左光祿大夫吏部
尚書許國公高士廉兵部尚書潞國公侯君集右衛
大將軍郢國公宇文士及左武衛大將軍翼國公秦
叔寶瀘州都督宿國公程知節等或宇量凝深地兼
賢戚或風鑒弘遠功參帳幕或志懷強正便繁左右
幹畧宏舉契濶戎旃或委質藩朝陳力王室誠著出
納節表屯夷經文緯武忠勤懇至固已契叶風雲寄
浮舟楫雖褒賢之道已紀於旂常而推恩之令未洽

於胄緒宜賜寵章式遵故實無忌玄齡如晦敬德各
封一子郡公士廉君集士及叔寶知節各封一子縣
公俾夫拜前拜後比蹤曩烈如帶如礪垂裕後昆
屈突通貞觀中爲洛州都督卒太宗幸洛陽宮思通
忠節拜其少子詮果毅都尉
宇文士及貞觀中檢校涼州都督涼土服其威惠入
爲衛大將軍錄其功封一子爲新城縣公
李勣爲右武侯大將軍封其父蓋爲濟陰王蓋固辭
王爵乃封舒國公授散騎嘗侍陵州刺史勣貞觀中
爲遼東道行軍大總管攻破蓋牟遼東白崖等數城

又從太宗摧殄駐蹕以功封一子爲郡王

王珪貞觀中爲禮部尚書與諸儒正定五禮書成封一子爲縣男

段志玄爲鎮軍大將軍寢疾太宗親自臨視顧謂曰當與卿子五品志玄頓首固請迴授母弟志感太宗遂受志感左衛郎將

高宗永徽三年五月詔隋儀同三司豆盧毓御史中丞游楚客齊侍中崔季舒給事黃門侍郎裴澤並門標忠鯁風烈可尚其子孫等並令所司量才處分九月以周司沐大夫裴融尚書左丞封孝琰有忠節

於前代制擢其子孫以旌介烈

總章元年三月詔曰西漢元勳縟禮崇於末嗣東京列將茂賞覃於後昆繼絕興亡同歸一貫皇家受命蒼旻肇膺玄籙恢張宇宙蕩一寰區御乾立極之圖諒資天啓撥亂經邦之略實賴人謀締想初基有足言者或委質唐郊首參一旅勤著荆棘勞宣草創或策名代邸先騁六飛誠備艱虞志踰金石咸以攀鱗上漢捧日登山氣叶風雲情均魚水其太原元從西府舊僚今親詳覽具爲等級贈司徒并州都督忠孝公士夔贈司馬淮安郡王神通贈開府儀同三司并

州都督夔國公劉弘基贈并州都督渝國公劉政會
贈開府儀同三司并州都督莒國公唐儉贈左衛大
將軍特進譙國公竇琮贈荊州都督邳國公長孫順
德贈護國大將軍涼州都督竇國公史大業贈幽州
都督濮國公龐卿運贈左武衛大將軍潭州都督巢
國公錢九隴贈華州刺史霍國公柴紹贈潭州都督
羅國公張平高贈相州刺史工部尚書河東郡公裴
寂贈洪州都督樂安郡公李思行贈洪州都督廬陵
郡公秦行師贈靈州都督貞定郡公許緒贈涼州都
督江夏郡公李高遷贈齊州刺史劉義節贈太尉申

國公士廉贈司空蔣國公通贈太尉并州都督梁國
公玄齡贈司空蔡國公如晦贈司徒并州都督鄂國
公敬德贈輔國公大將軍揚州都督襄國公陵志玄
贈驃騎大將軍益州都督宿國公程知節贈徐州刺
史胡國公秦叔寶贈左衛大將軍涼州都督鄧國公
宇文士及贈左驍騎大將軍荊州都督郟國公張公
謹贈荊州都督懷寧縣公杜公綽贈荊州都督沔陽
公公孫武達贈荊州都督遂安郡公李安遠贈代州
都督同安郡公鄭仁泰贈荊州都督漢東郡公李孟
嘗贈幽州都督曆陽縣公獨孤彥雲故始州刺史襄

武郡公劉師等並立為第一等功臣其家見在朝無
 五品已上官者子孫及曾孫擢一人授五品官若先
 有四品五品官者加授子孫第一人兩階若三品已
 上加爵三等其第二等功臣見在朝無五品已上官
 者子孫及曾孫擢一人授從六品已上官若先有五
 品已上官加一階六品官者加兩階三品已上官者
 加爵一等

咸亨五年劉仁軌為鷄林道大總管東伐新羅以功
 子姪三人並授上柱國州黨榮之號其所居為樂城
 鄉三柱里

蘇定方前後滅三國皆一擒其主賞財珍寶不可勝
 紀仍拜其子慶節為尚輦奉御及定方為左驍衛大
 將軍封邢國公又別封子慶節為武邑縣公

中宗神龍元年贈故大理卿徐有功越州刺史授一
 子官

二年中書令齊國公魏元忠與武三思等撰則天皇
 后實錄二十卷編次文集一百二十卷中宗稱善封
 元忠子衛王府諮議參軍昇為任城縣男是年韋安
 石為中書令子陟始十歲拜溫王府祭酒

睿宗太極元年五月親祀北郊詔桓彥範敬暉崔玄

韓袁恕已張柬之等其子孫並實封二百戶



